

< 移動阿標 >

通宵更，傳統想法係願意返通宵，通常係早更有一份全職或兼職既工作，到底以早更個份工為兼職性質或係當正職工咁做就各有故事。但係好多人一般都認為返通宵更都係以兼職性質作主導諗法。就係咁，令到通宵更的工作內容多咗 d 不成文規矩，例如：

1. 開工埋位做野時間，係天一半地一半，即 8 個鐘工時，實際做野時間祇係 3-4 個鐘
2. 完成半晚工作後，可選擇收工或在工地中搵個點休息至正式收工
3. 不用花費勞力及需要集中精神的工種最受歡迎 (保安，接線生)
4. 自由度大及現金出糧的工種也同樣受歡迎 (清潔，運輸)

這篇故事主角叫阿標，阿標有兩份工，早更做跟車，通宵在尖沙咀麼地道某酒店兼職做清潔。

阿標身材健碩，眉粗眼大為人豪邁，阿標時常向人吹噓，話自己個樣夠煞氣，乜污糟野見到佢都自動彈開。

這故事同番通宵更的不成文規矩有關，就係做完手頭上既工作就去搵個寶瞓覺。而阿標的通宵更主要任務係負責地庫宴會廳房的清潔。

某個晚上，零晨 2 點左右，阿標剛完成每晚例行清潔任務，好似平時咁去準備「床鋪」早抖。

所謂「床鋪」即係將 5-6 張宴會椅一字形並排，鋪上一張檯墊上去就完成了「床鋪」。阿標每晚收工後就係咁樣係 d 宴會椅上瞓覺，瞓到 6 點就收檔走人。當晚阿標好似往常咁去攤抖兼好快瞓著咗，當劈開眼時已經 6 點多，但奇怪係阿標發覺自己唔係瞓係宴會椅上面，而係瞓咗係

宴會椅旁張地氈上。阿標心諗可能太劫，劫到自己由宴會椅上跌落地氈上都無感覺...

由這晚開始，這種情況間時常出現，頻率約每星期 2-3 次，每次阿標瞓醒時同樣發覺自己係瞓咗係地氈上。但阿標心諗既然自己無受傷，又無阻住佢瞓就算數。

但這情況維持不久又開始有變，阿標雖然每晚依舊準時收工，並係熟悉床鋪上入睡，但質素急跌，原因是每次瞓咗無耐就隱約聽到有人傾偈聲，仲係男女聲都有。阿標覺得 d 傾偈聲大概係佢身邊約 1 米左右，徘徊飄盪，攞到阿標瞓下醒下，週身唔舒服。阿標甚至有幾次仲爆埋粗，叫 d 污糟野唔好再嘈住佢瞓。就係咁，情況又似好番呢。阿標當然又向工友炫威，誇讚自己如何勇猛嚇走 d 污糟野...

又是另一個晚上，阿標雖然早已在「床鋪」上，但未能完全入睡，係宴會椅上碌黎碌去，幾經辛苦終於入睡，當阿標瞓咗無耐，佢矇矇矓矓又聽到有人係佢附近傾偈，又係有男有女。阿標決定查過明白，於是佢慢慢張開雙眼，想睇下乜料。唔睇就估估下，睇完嚇到要去廁所。

阿標睇到係佢瞓緊既位置附近的宴會席赫然坐滿「賓客」身影，外觀有男有女，可以用衣香鬢影黎形容。阿標再仔細睇多眼，發覺佢地全部都無眼耳口鼻，阿標呢個時候全身毛管豎起。

阿標下意識將整個身體順勢反了一個轉，即是將個頭轉埋向椅背板位置。椅背板仍有一處空隙位，即椅靠背位置和坐椅平面造成 90 度位置上空的一段隙位，阿標此刻扮懶瞓而轉身，他在空隙位再偷看多一次，發現這批「賓客」不單是沒有面孔的，原來下半身淨係好似個影咁飄飄盪盪。突然，那些飄盪的下半身影，向阿標方向飄去並包圍阿標，阿標心諗唔知係咪俾 d 「賓客」發現佢係度扮懶瞓。阿標係呢個時候除咗週身寒之外，仲嚇到面青兼六神無主...

事有湊巧，Mike 陳- 阿標的領班因為唔夠人做野，係呢個時候特登過黎搵阿標幫手。Mike 陳因為趕住搵人就二話不說走入阿標個賣口，希望係最短時間內，叫醒阿標去救火。就係呢個原因，阿標算係俾 Mike 陳救咗。

阿標事後雖仍然留下來繼續做兼職，但捱唔到半年最後都遞信辭職。

事後阿標向人提及他離職的原因是：玩過咗火位。

真實阿標唔介意俾「賓客」抬落地，大前提係唔好太離譜，就等同河水不犯井水，各自精彩。但事實卻有大不同呢。阿標原來試過俾「賓客」被抬去後樓梯，去過女廁，甚至垃圾房。

出奇的是，翻看 CCTV 時，睇到阿標好似同緊一個人一路行一路講緊野咁向住女廁，垃圾房方向走，之後阿標就係咁話無端端瞓醒時發覺自己瞓咗係女廁，又或者瞓咗係垃圾房...

阿標見情況越黎越唔對路，決定辭職走人。

June 2020